

Комсомольск полит-сургуулин түрүн дигәс

Советск оln-әмтнә культу-ринь цааранднь улм өддүлхд Коммунистическ партъ болн Советск правительств ик чинр өгчәнә. Социализмәс коммунизмүр джисәд ордж йовх цагт, цуг оln-әмтиг долан джилә сургуулин медрлтә болгъхар, кәдлмшчирин болн крестьян улсин культурун-техническ кемджәгъинь өддүлүд, теднә медрлинь интеллигенцин кемджәнд күргх — өдгә цагин әркн төр мөн.

Эн учрар советск багъчуд уха-седклән өгч, бийсиннь медрл өддүлүхәр гүдждж сургууль дасхд шилтджәнә. Комсомольск организац багъчудин дунд сургъмджин кәдлмшин кемджә өддүлүдж, сургуулиг кемджәх коммунистическ тосхлтла ницүлдж, культурун болн идеологическ кәдлмшс ясурухд уха седклән өгчәнә.

Болв зәрм комсомольск организац сургуулин шин джилд белдхләри комсомольцнриг, багъчудиг политкружоксд дасгъхд икәр оныган өгәд, тедниг асхнд сургууль сургъдг школмудт, заочн сургууль дасгънд орлцуллгънд оныган сулар өгчәнә.

Эн эклджәх сургуулин шин джил 184 политкружок, 10 политшкол кәдлмшән эклв. Энд сурцахнь 3553 комсомольцнр, 384 кәвүд болн күүкд асхнд сургууль сургъдг школмудт, минъгъ шаху кәвүд болн күүкд әврән бийснь сургууль дасджана, 184 күн техникумст, институтст заочн сургууль сурчана.

Кружоксин занятин түрүн дигинь хәләхлә политкружоксин икиннь сән бүрдәмджтәгъяр занять эклцхәдж.

Западн района зәрм кружокс сән белдвр угагъар түрүн занятән эклцхәв. Улгүрлхд, 112-ч номертә совхозин эклц парт-организацин (сегләтрнь үр Новикова, пропагандистирнь уурмүд Чилин болн Савин). Виноградовск МТС-н парт-организацин (сегләтрнь үр Госарова, пропагандистирнь үр Илюшин) кружокс занятдән белн эс болси учрар эн кружоксин сонъсачнринь түрүн занять эклх өдртнь талдан кружокст орулгдв.

Сталинә нертә колхозин кружокин пропагандист үр Мищенко Николай нам түрүн занятд ирсн уга. 112-ч номертә совхозд үр Горючева гардджах кружокд 26 күүнәс 16 күн занятдирв, „Южный“ совхозд үр Проскурин гардджах кружокд 15 күүнәс 5 күн ирв.

Каспийск районд 830 күүнәс 33 комсомолец асхнд сургууль сурдг школд дасджана. Иим бәәдл Юстинск болн Западн райодт бәәнә. Комсомольск организац болн района асхнд сургууль сургъдг школд багъчуд элвгәр орлцулдж чадсн уга.

— ВЛКСМ-н райодин комитетсин ил темдгтә дөнъ угагъар кружоксин кәдлмш ясурулдж, сурачнрин медрлинь өддүлүдж болшго.

Асхнд сургууль сургъдг школд болн заочн сургууль дасджасн улсиг ягъдж сургууль дасджахинь комсомольск организац әврәннь хәләвртавад, теднд сәәнәр дөнъ-нөкд болад, сургуулян сәәнәр дасхиг тетгх кергтә.

Б. АСАНОВ,

ВЛКСМ-н Хальмг оргбюрон
инструктор.